

ТҮҮРТЛИКЛАР

(Шеър)

Дилга ишқ солдим мен - пок, сара бўлдим,
Лекин юрак-бағри хун, яра бўлдим.
Дунёда жоҳиллар бунча кўп экан,
Кўринганга мазах-масхара бўлдим.

* * *

Энг асл дамларни сочдик шамолга,
Шундан юрак тўла ўкинч-малолга.
Ҳали қўл урмаган ишлар бесанок,
Биз-чи, бериламиз тағин хаёлга!

* * *

Сарф этдинг умрингни — тиришдинг азал
Битта муаммони этайин деб ҳал:
Дунёни мукаммал кўрмоқчи эдинг,
Бўлолдингми аввал ўзинг мукаммал?

* * *

Англадим, нотекис экан бу ҳаёт,
Кўнглим, қилаверма қисматдан арз-дод.
Сенинг мартабангни камситган нарсаси,
Унутма, кимгадир — орзу, мукофот.

* * *

Гапим чинлигига қилмагин гумон,
Устун бўлолмассан дунёга, инон.
Йўқутик сандиғига тушарсан бир кун,
Юз йил от устида урсанг ҳам жавлон.

* * *

Ўкинма кетса гар давлатинг, молинг,
Қўлинг очиқлиги — буюк иқболинг.
Қошингда ғаним ҳам қилар илтифот,
Агар ҳиммат бўлса сенинг куралинг.

* * *

Офтоб қутлуғ саҳар кўтараркан бош,
Энтиккан чечакда кўрдим мен кўз ёш.
Севинчдан титрарди майса ва ҳатто
Пастқамликда йиғлар эди қари тош.

* * *

Кечаги тунд осмон бугун ложувард,
Гўё кўрмагандек зинҳор ғубор-гард.
Оҳ, менинг юрагим ёришармикин,
Кўрғошин булутдек эзар уни дард!

* * *

Тинмайин довлар ошасан, инсон!
Гоҳи дарёлардек тошасан, инсон!
Бир зум нафас ростла — дамлар ғанимат,
Манзилингга бунча шошасан, инсон?!

* * *

Кибру ҳаволарга чоғланма зинҳор,
Ҳаргиз ҳасратдан ҳам тургил устувор.

Бошингга ғам тушган дамлар, унутма,
Фақат меҳнат бўлур сенга маҳрам, ёр.

* * *

Инсон кўз юмганда йиғлаймиз зор-зор,
Гарчи у яшади тўкис, гарчи хор.
Оҳ, эди ўзича бетакрор олам,
Қайтиб туғилмагай бу олам такрор!

* * *

Кўксингда орзулар қулф урган чоғи
Кўнмасин дилингга ҳасратнинг доғи.
Бу дунё риёкор — хушёр бўл, унда
Кифтинг кўзлаб ётар ҳасад пичоғи.

* * *

Йиғлаб ол, гўдагим, тўкавер кўз ёш,
Ҳеч ким ҳолинг кўриб чайқамагай бош.
Мен ҳам гоҳ-гоҳ тўйиб йиғласам дейман,
Лекин эримас ҳеч кўксимдаги тош.

* * *

Ўтган умр ўтди — қайтмас давронинг,
Балки олдинда бор не-не туғёнинг.
Лекин шу сония баридан нақддир:
Билсанг, ҳиммати шу — сенга дунёнинг.

**Шоир Мирпўлат Мирзонинг
“Сайланма” китобидан**